



20. august 2021

UKA 2021/144

Inatsisartut ingerlatsineranut maleruagassaasa § 33 tunngavigalugu Inatsisartunut ukuningga aaliangiiffigisassatut siunnersuuteqarpunga:

**Inatsisartut aaliangiiffigisassaattut siunnersuut Naalakkersuisut peqquneqassasut misissueqqullugit, naartunermut suut pequtaasarnersut tassani sooq ilaasa naartuersinnissartik toqqartarneraat allallu naartuinnarnissartik toqqartarneraat, tassanilu aamma naartunermi- aamma naartuersinnermi angutaasoq qanoq peqataatinneqartarnerasoq. Misissuinerup inerneru kingusinnerpaamik 1. juli 2022 tamanut saqqummiunneqassapput.**

(Inatsisartunut ilaasortaq Anna Wangenheim, Demokraatit)

### **Tunngavilersuut**

Oqaluttuarisaaneq eqqarsaatigalugu naartuersinneq 60-kkunni aamma 70-kkunni arnat kiffaanngissuseqarnialernerannut attuumassuteqarluinnarpoq minnerunngitsumik arnat timiminnik namminneerlutik aaliangiisinnaassusaannut. Aaliangerneq taanna sulii Demokraatinit tapersorsorparput. Soorunalimi. Arnap kinaagaluaruniluunniit timini nammineq oqartussaaffigaa oqartussaaffigiuassallugulu taamaattumillu angummit akuersisitseqqaarani naartuersissinnaalluni. Demokraatit qaquguluunniit – QAQUGULUUNNIIT – arnat timiminnik namminneerlutik oqartussaaffeqarnerannik ajornerulersitsisumik suliniutit, tapersorsornaviangilaat.

Taamatut oqareerluta, oqimaatsoq oqaluuserisariaqarparput, qanoq ililluta ataatsimoorussamik pitsaanerusumik atoqatigiinnermut tunngasumik akisussaaqatigiissinnaaneq. Ingasappallaaqaaq, amerlavallaat atoqatigiinnermi illersuusernissartik pikkorluffigivallaarpat. Imminut apparisamullu kinguaassiutitigut nappaateqalernissamat ulorianartorsioertarput kissaatiginngisamillu naartulertoqartarpoq. Atoqatigiinnermi illersuuteqarneq illugiimmik atuuppoq – angutip arnallu akisussaaffik avittussaavaat.

Kissaatiginngisamik naartulernernut tunngatillugu kisitsisit eqqortut ersarissumik oqaluttuarput. Ajoraluartumimmi imaappoq, maani nunatsinni naartuersinnerit amerlassusaat meerartaarnerit amerlassusaatut amerlatigingajalluinnarmata. Taakkua takutippaallusooq, naartuersinneq ilaatigut naartunaveersaatit atorneqartoq<sup>1</sup>. Imatut paasillugu naartunaveersaat akisoorujussuaq. Naartuersinneq agguaqatigiisillugu 10.000 koruuninik akeqarpoq, allatut oqaatigalugu inuiaqatigiit naartuersinnernut ukiumut 9 millioner koruunit atortarpat.

Tamannali aningaasaannarnik kinguneqanngilaq. Naartuersinneq pilatsinneruvoq, timikkut kingusinnerusukkat kingunerluuteqarsinnaasoq soorlu meerartaarsinnaajunnaarnikkut taamatullu tarnikkut kingunerluutaasinnaasoq. Demokraatit isumaqarput, pingaartusoq tamakku kingunerluutaasinnaasut pinaveersaartissallugit, taamaaliornissamullu pitsaanerpaassaaq naartunaveersaatit ukkatarinerisigut

---

<sup>1</sup> <https://sermitsiaq.ag/node/213958>



naartuersinnerup pinaveersaartinnissaa. Taamatullu kissaatigaarput naartunermi- naartuersinnermilu angutip akuunerata eqqummaariffiginerulernissaa siunissami naligiisitaanerup qaffannissaa siunertarlugu.

Demokraatit isiginnittaasaat malillugu qularutissaanngilaq, naartuersinnermut naartunernullu kisitsisinik atorsinnaasunik amigaateqarnerput. Sooq arnat taama amerlatigisut naartuersinnissartik toqqartarpaat? Naartuersinneq naartunaveersaatit ilaattut atorneqarpa? Sooruna tamakkiissumik isigalugu, inuusunnerungaartut meerartaartarpaat? Meeqqat atuarfianni atoqatigiinnermut tunngasunik ilinniartitsissutigineqartartut annertunerusumik ukkatarineqartariaqarpaat? Inuiaqatigiittut naak iliuuseqaqataasinnaanerput? Naartunaveersaatit atoqatigiinnermilu illersuutit qanoq pissarsiaruminartigippat? Taakku apeqqutit allallu misissuinnermi ersarissarneqarnissaat kissaatigaara. Misissuineq kingusinnerusukkut naartuersinnerit appartinniarnernannut suliniutinut aallartitsinnermut atorneqartussaq, pitsaanerusumik kinguneqartussatut naatsorsuutigisaaq, soorlu kingunerisa/kingunerluutit minnerpaaffianiitinniarnissaannut, peqqinnartumik atoqatigiinnerup annertusarneranut, naligiisitaanerup nukittorsarneranut assigisaanullu.

Taamatut oqaaseqarlunga Naalakkersuisut akissutissaat partiillu allat ilanngutassaat qilanaarlunga utaqqissavakka.

**Pisortanut aningaasatigut allaffissornikkullu kingunissai**

Misissuineq 250.000 aamma 500.000 koruunit akornanni akeqassangatinneqarpoq AC-sulisoq affarmiit iluitsumut.

**Namminersorlutik inuussutissarsiuteqartunut aningaasatigut allaffissornikkullu kingunissai**

Soqanngilaq

**Innuttaasunut aningaasatigut allaffissornikkullu kingunissai**

Soqanngilaq